



隙光亭雜識

卷四



隙光亭雜識卷四



長白揆叙愷功父惟實居士纂集

男永壽仁山甫謹較訂

竊據之國其歷年最久者無如大理段氏起於五代後  
晉天福二年至宋理宗寶祐二年而為元所滅凡二  
十二世三百五十年僭號紀元史家多闕今改而記  
之其偽太祖曰段思平改元文德卒子思英立改元  
文經不道其臣董伽羅廢之而立思平弟思良改元  
至治卒子思聰嗣改元明德又改廣德傳子素順改

元明政時宋藝祖已受周禪鑒唐時南詔叛亂以王  
斧畫大渡河曰此外非吾所有也由是雲南不通中  
國素順卒子素英嗣素英或作秉英後凡稱素者皆  
作秉改元者五曰廣明曰明應曰明聖曰明統曰明  
治卒子素廉嗣改元啟明其子阿統性頑鈍不知禮  
義乃廢之而立其姪素隆爲嗣改元明通素廉之妻  
撫阿統之子素真幼而警敏祖母憐其不得立使人  
讓國相相言於素隆素隆乃避位而傳國於素真改  
元正治卒孫素興立改元聖明征歛苛急諸大臣共

廢之思良之後無可立者乃更立思平之孫思廉宋  
仁宗皇祐元年廣右儂智高反狄青擊敗之智高謀  
入大理余靖募死士使大理以求之智高子身投蠻  
蠻鳩而殺之大理遂函送其首至是始與宋通思廉  
在位久改元者四曰保安曰正安曰正德曰保德禪  
位於子連義遣使入貢於宋時神宗熙寧中也連義  
爲其臣所弑從子壽輝立改元上明傳思廉之孫正  
明改元保定後又改建安改天祐避去爲僧國人奉  
其相高侯之子昇泰立之是爲大中國改元上治而



段氏中絕昇泰立二年將死謂其子泰明曰段氏不振國人推我我不得已從之今其子已長可還其故物爾後人勿効尤也泰明遵父遺命復立段正明之弟正淳改元天授是爲後理國改元三曰明開曰天政曰文安徽宗大觀三年卒子正嚴嗣或曰名和譽改元五曰日新曰文治曰承嘉曰保天曰廣運遣使求內附許之貢馬及麝香牛黃等物宋冊爲大理國王高宗紹興三年復求入貢時以中國多故未之許正嚴立四十卒子正興嗣或作易長改元永貞又改

大寶龍興盛明建德卒子智興嗣或作正智改元利貞又改嘉會卒子智廉嗣廉或作連改元鳳曆曰元壽卒弟智祥立改元天開又改仁壽後禪位於子祥興改元道隆時理宗嘉熙三年也初元太祖鐵木真將南征大理至鐵橋石門關遇角端獸而還至是已滅金圖宋先謀取蜀宋余玠守重慶不得入乃議由吐蕃出大理淳佑四年蒙古兵出靈關大理遣將高禾迎戰敗死會元主窩濶台卒兵還祥興卒子興智嗣改元天定時宋淳祐十二年卽元憲宗之元年也

元復遣太弟忽必烈南征與智迎戰大敗奔善闡寶  
祐二年元兵攻克之執與智赦弗誅以其弟段實爲  
總管卒與元相終始焉段實或作信苴日與智之諸  
父未知孰是

段氏素英之世雲南大旱或言金輪寺有圓石如磨高  
僧摩伽陀所遺也天旱以其石浸池卽雷雨名曰濟  
旱石遂欲令人舁取國相高侯曰遠難致也因就都  
下黑龍潭以虎頭投之名曰攪龍以龍虎能致風雲  
也果得雨

南詔異牟尋始改國號曰大理封境內山川爲五岳四  
瀆中岳點蒼山東岳絳雲露山南岳蒙樂山西岳高  
黎共山北岳玉龍山四瀆一曰黑惠江一曰瀾滄江  
一曰金沙江一曰潞江

宋徽宗政和六年大理段和譽遣使入貢又有樂人善  
幻戲卽大秦絳軒之遺名五花鬪弄徽宗愛之使梨  
園優人學之以供歡宴賞賜不貲

阿瘡瘡吳語也吳俗小兒輩遇可羞事必齊拍手叫阿  
瘡瘡瘡之音與歪相近唐六如常題列仙傳云但聞



陸光學雜語 卷四 四 藏板  
白日昇天去不見青天走下來忽然一日天破了大  
家都叫阿瘡瘡

太平廣記談諧部有千字文乞社語一則湯臨川還魂  
記中亦有此一段其文更廣可見古人雖諧謔亦必  
有所本非出杜撰也

吳門串月據徐波元歎詩序云有橫說豎說之不同謂  
從寶帶橋外出數有七十二此橫說也一云葑門外  
極饒溪港光影相傳望如塔燈此豎說也然亦如阿  
閔佛國裁一現耳丙子秋薄暮登楞伽山坐靈官殿

更餘孤魄漸升從溪港一一分形現身無數始大異  
之二更後更奇遊人匆遽而返未盡其變也其詩有  
云纖微吞吐誠非易光彩飛沉無定位真月猶未現  
全身先見第三與第二一溪一月非無因於月不知  
誰最親孤魄漸離煙霧窟衆壑寫盡琉璃輪金光激  
射難可擬玉塔倒懸聊近似塔顛一月獨分明千百  
化身從此止描摹勝景能令移情也

諸佛誕辰惟釋迦四月八日爲有據然猶有夏正周正  
之辯周昭周莊之殊至觀音生日以爲有三謂二月

十九六月十九九月十九日也閩巷流傳不知所本  
吳下又以十一月十七日爲阿彌陀佛生辰農家以  
此日占來年米價之貴賤東南風則貴西北風則賤  
諺云吹我面有米也不賤吹我背無米也不貴

埤雅云四五月間梅欲黃落蒸濕而雨謂之梅雨天寒  
則主旱諺云黃梅寒井底乾又吳俗以芒種後逢壬  
日爲入梅以夏至日起時時分三部謂之黃梅三時  
共十五日三日爲頭時五日爲中時七日爲末時梅  
雨時雨田所必資也方梅而雨主旱時盡而雷主澇

諺云高田只怕迎梅雨低田只怕送時雷是也中時  
而雷謂之腰報亦主多雨名倒黃梅

蠟梅以經接者爲佳其花開常半含名磬口以子種出  
而不經接者花小而香淺名九英俗譌爲狗蠅錢牧  
齋詩狗蠅今日徧江鄉

吳俗田家以上巳日聽蛙聲占水旱午前鳴主高田熟  
午後鳴主低田熟粵中則言蛙聲大主水大蛙聲小  
主水小諺云田雞聲啞田好稻把田雞聲響田好蕩  
槩唐人詩田家無五行水旱卜蛙聲則此說固有本



也又有分龍日以四月二十日爲小分龍五月二十日爲大分龍前此雨必徧及自分龍後或及或不及若有分之者然分龍次日雨則主豐稔

吳人好遊而性又猷范至能詩云我是蘇州監本猷是吳人固不諱猷也每歲自二月始和卽命畫船簫鼓游山攬勝幾無虛日他如六月念四日游荷花湯八月十五日傾城游虎丘笙歌徹夜謂之勝會重陽日吳山登高遊治平寺習俗使然不問雨晴寒暑也袁中郎爲詩嘲之云蘇人三件大奇事六月荷花二十

四中秋無月虎丘山重陽有雨治平寺由斯以觀猷名果不虛得也

昔人嘗記俚鄙詩句云桃生毛彈子瓠長棒槌兒墻歌壁凸肚河凍水生皮又塚子地握槩星宿天圍棊開壘甕張口捲蓆牀剝皮又苦竹筍抽青櫬子石榴樹挂小餅兒又霧是山巾子船爲水靸鞋又棹搖船掠鬢風動水搥胸又栗爆燒瓊破猫跳觸鼎翻又蛙翻白出潤蚓死紫之長又脛艇化爲紅玳瑁眼睛變作碧琉璃又竹詩葉垂千口劍榦聳萬條鎗俱可笑余



又聞有一聯云過斷船搔背樵柴山薙頭亦甚類此  
明陸宮保耄餘雜識云晉崔豹謁郡將陳陳語豹曰君  
去崔杼幾世豹曰民之去杼如明府之去陳恒傷於

虐矣

一云崔琰  
陳元方

盍應之曰姓氏偶同未聞陳氏皆陳

恒之後也不亦言婉而意獨至乎陸機初入洛盧志  
問曰陸遜陸抗於君遠近機曰如君於盧毓盧珽彼  
先發者既失之薄矣而我以薄應之是胥失矣何以  
責人論者謂河橋之敗機雲之死志有力焉是可爲  
小不忍者之戒也魏沈介以舟行阻風絕糧從姚彪

貸百斛鹽以易粟姚命覆鹽於江中曰明吾不惜惜  
所與耳弗與已矣而以惡言辱之爲不仁矣晉王修  
齡貧乏陶範以一船米遺之却曰王修齡雖飢當就  
謝仁祖索食何須陶胡奴不受已矣而以不屑諾之  
爲已甚矣故凡處人已之間遇事之可否以理裁之  
則可以氣加之則不可至哉斯言得處世之正矣如  
聞倪元鎮寓居鄒氏日鄒塾師有壻曰金宣伯一日  
來訪倪聞宣伯儒者倒履迎之見其言貌麓率大怒  
掌其頰宣伯媿忿不見主人而去鄒出頗怪之倪曰



彼面目可憎語言無味吾斥去之矣金自訪鄒於倪何與卽惡其麓率遠之已矣奚至發怒批頰耶又張士誠弟士信聞倪善畫使人持縑幣求其筆倪怒曰倪瓚不能爲王門畫師卽裂其絹其後士信遊太湖與倪相遇士信大怒欲手刃之賴諸人力爲營救然猶鞭之數十乃免夫不肯作畫則却其縑幣已矣何必裂絹後之僂辱蓋自取耳非不幸也獨其愧楊維禎一事爲最當維禎耽好聲色每會間見歌兒纖足者卽脫其鞵載盞行酒謂之金蓮盃一日與倪會飲

楊復脫妓鞵傳觴倪怒翻案而起席遂散元鎮此舉可謂得惡之正矣維禎享當時盛名而舉動如此王宗常但詆爲文妖似猶未蔽厥辜

齊神武出兵臨行留陳元康在後馬上有所號令九十餘條元康屈指數之盡能記憶又嘗口授祖珽三十六事珽出而疏之一無遺失兩人之強記畧相埒然孝徵奸邪無行諂附權倖卒以覆齊其不及元康遠矣

明太祖立鍾山十廟其第三曰祠山廣惠王未知爲何

神也余按宋嘉熙中三山周秉秀有祠山事要八卷云王諱渤清河張氏相傳生於漢代吳興郡烏程橫山人也王一妃二夫人九弟五子一女八孫集載其世系及封爵次序顯應事迹甚詳惜世罕其本見者甚尠耳

經首題火字此是陀羅二字顯密圓通云三藏教盡從陀羅尼所出

直諦三藏說有九識名阿摩羅卽第八之異名也此翻無垢謂成佛時轉第八以成此識無別第九宗鏡云居初位而號賴耶處果位而稱無垢

楞嚴云阿那律陀無目而視跋難陀龍無耳而聽菟伽神女非鼻聞香舜若多神無身覺觸憍梵鉢提異舌知味寂音云蛟無目能行水母以蝦爲目不必那律也蛇以眼聽不必二龍也螻蟻以身爲鼻不必恒神也風拒之則怒御之而行不必舜若也蜂以腋爲舌不必憍梵也

正理論有羅漢不識赤鹽之語按藏中說法預婆羅門問羅漢何名赤鹽鹽有幾種羅漢曰我知法預輕慢



隋書雜譜 卷四 藏板  
比丘今復惱我鹽止是鹽佛言此羅漢未從師學不能答鹽有比丘名弗跡盧汝可往問比丘答云鹽有二義一種味如大海水同一鹽味二性味有黑鹽赤鹽辛頭盧鹽拔遮鹽毘盧遮鹽移多鹽畧語二種若生若煮是名鹽義

山谷詩人言九事八爲律出漢書主父偃傳上書言九事其八爲律令一事諫伐匈奴也

天有十法一飛去無限數二飛來無限數三去無礙四來無礙五天身無皮膚骨髓筋脉血肉六身無不淨

大小便利七身無疲極八天女不產九天目不眴十身隨意好青黃赤白隨意而現見經律異相亦三藏法數所未及者

大理段素興好佚遊廣營宮室築春登雲津二隄分種黃白花其上有遶道金稜縈城銀稜之目每春月挾妓載酒鬪草簪花以爲樂時有一花能遇歌則開遇舞則動素興愛之因名素興花後又訛爲素馨云余覽內典有樹名無憂妓女觸之衆花競發枝條垂拂如有愛心又樹名好樂音聞作樂聲舉身搖動枝條

裊娜如舞躍人又樹名好鳥吟聞鳥吟聲即便搖動  
 枝條裊娜如喜抃人觀大理所記則此三樹者可信  
 不誣滇南地近西域於此亦可驗矣粵志稱陸賈得  
 種自西域因說尉佗移至廣南則素馨自漢時已有  
 之非始於段氏也素馨之嗣主大理蓋在宋仁宗之  
 世

古杭雜記云史彌遠作相時士夫多以鑽刺得官伶人  
 俳優者一人手執石用一大鑽鑽之久而不入旁一  
 人以物擊其首曰汝不去鑽彌遠却來鑽彌堅可知

道鑽不入也按北史郭祚子景尚善事權寵世號曰  
 郭尖時有李世哲者亦善鑽刺號李錐鑽刺二字本  
 於此

古人以名為字者漢孔安國字安國晉安帝諱德宗字  
 德宗恭帝諱德文字德文會稽王道子字道子北史  
 慕容紹宗馮子琮魏蘭根南史蔡興宗唐張嘉貞郭  
 子儀辛京杲戴休顏張孝忠尚可孤孟浩然顏見遠  
 田承嗣田季緒李嗣業皆以名為字

又有祖子孫同用之字者如王羲之王允之王晏之皆



三世同用之字有父子同用之者如胡母輔之吳隱之顏悅之皆兩世同用之字

又如六詔之族皆子承父名南詔蒙氏之始曰細奴羅其子曰羅晟晟之子曰晟羅皮皮之子曰皮羅閣閣之子曰閣羅鳳鳳之子曰鳳伽異異之子曰異牟尋尋之子曰尋閣勸勸之子曰勸龍晟晟之子曰晟豐祐或云豐祐慕中國始不連父名但稱豐祐焉祐之子曰世隆隆之子曰隆舜通鑑誤作法舜之子曰舜化真蒙氏自細奴羅至舜化真十有三世

史記匈奴傳獫狁葷粥居於北蠻則北狄亦可以稱蠻也吳陸抗傳靜言庸違唐書攸戒是堯典亦可稱唐書也史記夏紀帝桀是三王亦可稱帝也漢書廣川王越傳盡取善繒句諸宮人注云句遺也是句不止於自乞與人亦可以稱句也後漢書王喬傳尚方診視舄是視物皆可稱診不止診脉也徐孝穆有答餉鏡詩是贈物皆可稱餉不止飲食也

父命得稱敕後漢樊重焚券諸子從敕是也母可稱大人後漢范滂就獄與母訣曰大人割不忍之恩是也

父可以稱聖善楊修答曹植牋有聖善之教注謂武帝也人臣不嫌稱萬歲馬援傳援醜酒亭軍士皆伏稱萬歲又郭子儀與回紇盟曰大唐天子萬歲回紇可汗亦萬歲兩國將相亦萬歲是也上父母壽可稱萬壽潘岳閒居賦稱萬壽以獻觴是也屋之高嚴者通謂之殿漢書霍光傳鴟鳴殿前樹上黃霸傳郡國上計長史一輩先上殿是也造謁人亦可謂之朝司馬相如傳臨邛令日往朝相如是也人臣得言垂拱薛宣自言垂拱蒙成是也人臣得言諒闇山濤傳武

帝詔云山太常雖居諒闇是也人臣得稱聖君賢君晉曹摅一縣號曰聖君薛宣傳屬縣各得賢君是也文昌雜錄載有嫁杏法又言江淮亦多有嫁橘法凡果木花而不實者用之有驗嫁杏嫁橘其事頗奇可入詩料也

契丹謂其主任坐處曰捺鉢四時皆有之猶中華言行在也

左傳縉雲氏有不才子貪於飲食冒於貨賄侵欲崇侈不可盈厭聚斂積實不知紀極不分孤寡不恤窮匱



天下之民以比二凶謂之饕餮說文云貪財爲饕貪食爲餮後世每以嗜食者爲老饕或曰健饕蓋起於東坡之老饕賦也

齊梁之時尚有未辯四聲者或云如天保寺刹是也因有云天子聖哲者天子萬福者燈盞柄曲者宋王荆公爲酒令云有客姓任名稔販金販錦關吏止之曰任稔任入金錦禁急余又聞有一令云官長升堂笞吏數十何罪致斯因隱印一

宋時燕北風俗不問士庶皆自稱小人然春秋之世小人有毋皆嘗小人之食又以小人之腹爲君子之心又劉先主亦嘗自稱小人見三國志然則小人之稱乃自古已然矣

粵中木棉花與吳下農家所種者絕不同其樹高十餘丈大數抱二月開花作紅色結實如檳榔五六月熟角裂中有綿飛空如雪可以絮褥勝於江淮用蘆花也名曰攀枝花以綿中有子如梧子隨綿飄泊著地又復成樹樹易生倒插亦茂枝長每至偃地人可手攀故得此名或以爲布可禦雨

屈大均花木曆云元旦雞鳴以火照桑果無蟲以斧駁  
斫樹則子繁不落是曰嫁樹嫁李以石安枝間嫁石  
榴以石累根上嫁諸果以長竿繫樹梢由斯以觀則  
凡果樹皆可嫁不獨杏與橘也

楞嚴經必汝執言身眼兩覺應有二知卽汝一身應成  
兩佛坡詩淵明形神自我樂天身心相物而今月下  
三人他日當成幾佛

莊子野馬也塵埃也唐人以爲一物如吳融云動梁間  
之野馬韓偓云窗裏日光飛野馬是也沈存中筆談

辯以爲非謂野馬乃田野間浮氣遠望之如羣羊又  
如水波佛書云熱時野馬陽燄卽此物也余觀白香  
山讀禪經詩陽燄如何更覓魚正取水波之義耳

白香山送宗實上人遊江南詩每過渡頭應問法無妨  
菩薩是船師出華嚴經善財童子五十三叅其二十  
二叅婆施羅船師爲說大悲幢行云如諸菩薩善能  
遊涉生死大海乃至能以神通度衆生海是也婆施  
羅者華言自在

吳下短齋期滿食腥謂之開葷梁武帝謂之解素見淨



陽光亭雜記 卷四 藏板  
業賦序白詩則云開素如開素盤筵後日開又月終齋滿誰開素是也月終謂正五九月唐人每以此三月持齋也老學庵筆記云唐高祖武德二年正月詔自今每年正月五月九月十直日所在公私宜斷屠殺此三長月斷屠殺之始士大夫如白居易輩有遇此三齋月謝客專延緇流作佛事者

白詩有一句中具三事或三物者如云遊山弄水攜詩卷看月尋花把酒盃又輕屐單衣薄紗帽淺池平岸庫藤床又魚鮮飯細酒香濃又同年同病同心事又

野桃山杏水林擒又棗赤梨紅稻穗黃又短靴低帽白蕉衫又冰池霜竹雪顛翁之類他集亦間有之而此公爲多

明萬曆間吳中有一士夫曾居顯僚致政家居素與紫栢大師爲方外交一日聞師至嘉禾將鼓棹往訪焉門下有食客某姓者甚貧僻居郊外一椽僅蔽風雨竈突無煙亦無妻孥而性頗明黠以是爲士大夫所憐恒衣食之月夕花晨山間水際常令陪侍談笑至是聞嘉禾之行乃長跪以請曰某夙聞大師聲震叢



林未審有緣得從公一覩慈容否士夫許之喜而偕  
往比至又跽啟曰大師人天皈仰某以鄙賤何敢輕  
言叩謁惟公先爲齒芬道某悃誠倘蒙矜允然後敢  
入耳士夫唯唯見師後因話其事師曰此畜乃敢來  
見吾耶士愕然莫解良久乃命侍者汝前往闔門令  
僅通一綫仍高唱大師來侍者如教某於門外聞唱  
聲則戰慄伏地色如死灰俄而大師至端然卓立某  
從門隙稍一瞻仰叩頭不已師乃微哂而回比門啟  
則其人已不知所之矣士夫令從者徧覓踪蹟竟爾

杳然及辭歸舟伺至昏黃終不可得到家三五日其  
人亦不見過心甚訝之因使僕至彼所居闕其戶間  
其無人窮索之則墻角有一大穴深而且黝秉炬以  
入於穴底得一死野狐方悟其人乃野狐所化正欲  
藉肉身大士慈力脫彼軀殼耳

橄欖廣南人云有二種曰白欖曰烏欖白者爲雄烏者  
爲雌栳榔本草以小而味甘者爲山欖榔亦名公欖  
榔大而味澀者爲豬欖榔亦名母欖榔或言尖長有  
紫文者名欖圓大而矮者名榔榔力大欖力小荔枝



有山枝有水枝水枝食罷乃食山枝

洞庭湖神像龍首而人身腰微俯一手加眉際作遠矚狀商賈往來者三老必力戒毋作此狀恐神以爲倣之而觸其怒耳或曰神卽柳毅也

廣南花木別名水松者椶也一名水杉椀一名管樹荔枝一名離支亦曰麗支栲榔一名麩木羊桃一名洋桃亦名三斂子亦曰山斂夾竹桃一名桃柳又曰地開桃蜜望一名望果宜母一名梨檬子卍果一名蓬鬆子椶櫚子俗稱牛奶柿亦曰牛乳子羊齒子一曰

羊矢山葡萄一名萸萸山韶子一名毛荔支亦曰毛玃子都捻子一名倒捻子女青一名萬年枝一名凍青山丹一名不夜花一名珊瑚林又名馬纓丹佛桑一名花上花一名愛老一名福桑瑞香一名雪花一名奪香金鳳花一名指甲桃山石榴一名滿山紅山礬一名白嬋子花欄一名花狸烏木一名角烏雞翅木一名雞刺香枏一名端正樹槌子木一名員子一名赤黎椅一名雲楸龍眼一名細荔海棗一名紫京散沫花一名指甲花木槿花一名土牡丹



草之屬有人面竹一名佛肚竹芳竹一名澀勒一名篋  
 筲籬竹亦曰白葉苦竹又名過山苦龍公竹一作籠  
 篋沙筋竹名越王餘算香牙蕉一名龍奶一名折腰  
 娘水蕉一名蓮花蕉美人蕉一名蘭蕉朱蕉一名朱  
 竹一名鐵樹紫蔗一名崑崙蔗一名藥蔗蘭一名水  
 香賽蘭一名雞爪蘭亦曰碎蘭一名暹蘭薏苡一名  
 藪米交趾人呼為斡珠素馨一名河南花鳳尾蕉亦  
 曰火蕉胡蝶花一名金莖花雁來紅亦名紅素馨一  
 名老來紅藤葉一名落葵苦瓜一名菩蓮一名君子

菜高良薑一名山薑花猴薑一名樹雞三賴一名山  
 奈亦曰廉薑地腎一名松黃且落花生亦曰落花參  
 藕豆一名蛾眉豆睡菜一名瞋菜仙人掌一名千歲  
 子慎火一名戒火又名火秧又曰露堯花牛屎勒風  
 草亦曰風菜涼粉草一名仙人凍香薷一名石香柔  
 亦曰香茸排草一名留香草亦曰養香鶴草亦曰蛾  
 眉草斷腸草一名苦吻亦曰苦藥又名苦蔓公又名  
 大葉茶甘露藤一名肥藤涼口藤一名斷續藤東風  
 菜一作蕞風又名綠耳麴藤亦名酒藤燭竹一名丞



相竹一名江南竹

禽之屬有么鳳一名倒挂子孔雀一名孔雉戴勝雄名  
丁髻郎雌名丁髻娘或曰釘髻鷓或謂之冠髻官雉  
一名山判官鷓一名綬鳥秦吉了一名了哥亦曰別  
哥亦曰別別羅浮五色雀亦曰小鳳又謂之木客鳥  
一名子弟雀又名五姊妹山鷓一名山鳥一名珊瑚  
翡翠一名魚翠鷓鷃一名巧婦鳥又曰相思仔比翼  
鳥一名蠻蠻青雛一名橄欖雛碧雞一名越王山雞  
鷓雞一名雨落母亦曰麥雞蘆雞亦曰茅雞石雞亦

曰潮雞鵞鷓一名越王鳥一名象鷓潮鳧亦曰信鳧  
淘鵝亦曰逃河一名水流鵝

獸之屬果下馬一曰果騮狒狒一名山笑鷩鷩亦曰山  
都騰豺一名騰豸乳羊一名茅羊水獺一名獬狃山  
獺一名插翹豪豬亦曰蒿豬山豬一名懶婦香狸亦  
名果狸竹鼯一名竹豚

鱗之屬鮓亦曰三鰲貼沙一名版魚亦曰左魴鱗魚一  
名鱗龍魚鮓魚一名鏡魚鯊一名潮鯉蠟魚一名狼  
藉章魚一名章舉鳳尾魚一名馬鱗鱔魚一名忽雷

介之屬蠓一名蠓房蚘一名花蠓瓊瑤一名共命羸又  
 曰月蝓又名沙羸海鏡一名石鏡指甲羸一名石蝓  
 一名紫蝓流羸一名甲香羸蛤蚧一名赤口羸車螯  
 一名沙蚘

蟲之屬水母一名海蛇金花蟲一名綠金蟬蝦姑一名  
 海馬亦曰水馬蛤蚧一名吉慶蛇

獐獮似狸高足而結尾有黃白黑三種其產於暹羅者  
 尤善捕鼠世或名猫為蒙貴者以此

用艾炙者每曰幾壯初不之解夢溪筆談云壯者以壯

人為則也如言若用于壯人當依此老幼羸弱則量  
 力減之也

歷代建都攷

伏羲 神農皆都陳 今河南開封府陳州

黃帝都涿鹿 今直隸順天府涿州

少昊都曲阜 今山東兗州府曲阜縣

顓頊都帝丘 今直隸大名府開州

帝嚳都亳 今河南河南府偃師縣

堯都平陽 今山西平陽府



舜都蒲坂今平陽府蒲州

禹始封夏伯今開封府禹州都安邑今平陽府解州安邑縣堯舜禹所都

相去不過二百里皆冀州也帝相徙帝丘少康復還

安邑

契始封商今陝西西安府商州相土遷商丘今河南歸德府附郭商丘縣湯居

亳歸德府東南廢穀熟縣是是為南亳府北四十里有大蒙城為

北亳湯始興地也景山在焉亦曰景亳又偃師縣為

西亳所謂三亳也湯即位居南亳後徙西亳仲丁遷

囂亦曰敖今開封府鄭州滎陽縣河亶甲居相今河南彰德府城西北有亶甲

城祖乙圮於耿今蒲州河津縣遷邢今直隸順德府附郭邢臺縣盤庚遷

殷即西亳武乙徙朝歌今直隸大名府濬縣西廢衛縣是

后稷始封邰今陝西西安府乾州武功縣西南黎城是公劉遷豳今西安府邠分三水

縣西古豳城是太王居岐今陝西鳳翔府扶風縣西北岐陽鎮是南有周原始改號

周王季宅程亦曰郢今西安府咸陽縣之東安陵城是文王遷豐今西

安府附郭長安縣西北靈臺鄉豐水上武王都鎬今長安縣西北昆明池北高陂是去豐二

十五里成王營洛邑名曰東周今河南府治是懿王徙犬丘今西

安府興平縣東南槐里城是平王東遷洛邑即洛傳至考王封其弟

揭於河南是為河南桓公即西周也桓公孫惠公又

封其少子班於鞏是為東周惠公周室衰微所有者

河南今河南府洛陽今河南府城東洛水北穀城今在

河南府新城在河南孟津平陰縣西二十里偃師縣今鞏縣緱氏在

師縣南七城韓趙即其所封分周為二河南緱氏穀

六十里城屬西周洛陽平陰鞏屬東周於是東西周同於列

國顯王特寄居東周之洛陽而已至赧王復遷於周

而周乃亡

秦非子始封秦城今陝西鞏昌府莊公居犬丘見上文

公居汧渭間今鳳翔府郿縣寧公徙平陽今鳳翔府

有平陽鄉德公徙雍今鳳翔府獻公徙櫟陽今西安府臨潼

是孝公作咸陽今西安府咸陽縣徙櫟陽見上文既滅

漢初王巴蜀都南鄭今陝西漢中府徙櫟陽見上文

楚都洛陽因周都也定都長安今西安府城西

光武都洛陽見上文董卓遷獻帝於長安尋還洛陽曹操

復遷帝於許今開封府許州

魏武帝都鄴今漳德府臨漳文帝都洛陽

吳大帝初屯吳今江南蘇州府吳縣徙丹徒今江南鎮江府附

徙秣陵號建業今江南江寧府又以武昌為行都今湖廣武昌

謙牧堂



蜀先主都成都今四川成都府

晉都洛陽愍帝都長安元帝都建康即吳建業

宋齊梁陳皆因晉都

魏拓跋力微始居盛樂在今大同府西北三百里猗盧徙馬邑今大同府

朔州屬縣什翼犍都雲中朔州北三百餘里雲中城是道武都平城今大同府

同府附郭孝文遷洛孝靜遷鄴為東魏孝武入長

安為西魏

北齊起晉州今平陽府後居晉陽今太原縣洋都鄴因東魏都

周起自高平今平涼府鎮原縣亦曰原州覺都長安因西魏都

隋都長安改築長安城而都之今西安府城是

唐因隋都

後梁都洛陽末帝都汴州今開封府

後唐莊宗即位於鎮州今大名府滅梁後都洛

後晉都汴後漢後周皆因之

宋都大梁今開封府高宗都臨安今浙江杭州府

遼都臨潢曰上京在大寧衛東北七百餘里

金都會寧曰上京在遼東三萬衛西北三百餘里亮徙燕今直隸順天府宣宗

珣遷汴哀宗守緒亡於蔡州今汝寧府

元初都開平今直隸宣化府東北七百里廢開平衛是徙燕今順天府

明初都金陵今江南江寧府徙燕今順天府

春秋列國所都攷

魯都曲阜見前少昊

衛都朝歌見前商武乙戴公廬曹今直隸大名府滑縣文公遷楚丘今滑

縣東廢衛南縣是成公徙帝丘見前亦曰濮陽元君徙野王顓頊

今河南懷慶府附郭河內縣是

齊太公封營丘今山東青州府臨淄縣胡公徙薄姑今青州府博興縣東北薄

姑城是獻公徙臨淄即營丘

晉叔虞封唐今山西平陽府翼城縣東唐城是子燮徙晉今山西太原府太原縣

穆侯徙絳孝侯改絳為翼亦曰故絳今翼城縣東南古翼城是景

公遷新田仍稱絳今平陽府絳州絳縣

宋都商丘見前商相土

鄭都新鄭今開封府禹州新鄭縣又西安府華州西北有故鄭城

其始封邑也

陳都宛丘即陳州

蔡都上蔡今河南汝寧府上蔡縣平侯徙新蔡今汝寧府新蔡縣昭侯徙



州來亦曰下蔡今江南鳳陽府壽州北下蔡城是

曹都曹今山東衮州府曹州定陶縣

許都許今河南開封府許州靈公遷葉今河南南陽府裕州葉縣悼公遷夷今鳳

陽府亳州東南旋還葉又徙白羽今南陽府鄧州析川縣許男

廢城父縣是斯又為楚遷於容城今湖廣荊州府東廢華容縣是

秦前見

楚熊繹封丹陽今湖廣荊州府歸州東北丹陽城是文王始都郢今荊州府城北

紀南平王更城郢今荊州府東北郢城是昭王徙都在湖廣襄陽府宜城

南旋還郢至襄王東北保陳城即陳州考烈王遷鉅陽

在陳又東遷壽春即壽州後懷王孫心都盱眙今鳳陽府泗洲

盱眙又徙柳今湖廣縣

吳都勾吳太伯居梅里今江南常州府無錫縣東南有太伯城闔廬始築

吳郡城都之即今江南蘇州府城

越都會稽今浙江紹興府治是句踐嘗徙瑯琊今青州府諸城縣東南瑯琊城是

戰國七雄所都攷

韓武子封韓原故韓國也今西安府同州韓城縣宣子徙居州今懷

慶府城東南貞子徙平陽即堯都哀侯滅鄭徙陽翟今禹

州

魏畢萬封魏城故魏國也今平陽府蒲州東南永樂城是悼子徙霍今平

陽府魏絳徙安邑即禹都惠王徙大梁遂稱曰梁今開封府

趙造父封趙城今平陽府趙城縣趙夙邑耿今蒲州河津縣趙衰居原

今懷慶府濟原縣西北原鄉是簡子居晉陽今太原縣獻侯治中牟今彰德府

湯陰縣西敬侯始都邯鄲今直隸廣平府邯鄲縣

燕都薊今順天府附郭大興縣

齊 秦 楚竝見前

項羽分王諸將所都攷

楚分爲四 西楚霸王項籍都彭城今江南徐州 衡山王

吳芮都邾今湖廣黃州府西北邾城是九江王英布都六今鳳陽府

壽州南廢安豐縣是臨江王共敖都江陵今荊州府附郭縣

趙分爲二 常山王張耳都襄國今直隸順德府治 代王趙

歇都代今山西大同府蔚州治

齊分爲三 齊王田都都臨淄即故齊都 濟北王田安都

博陽今開封府陳州商水縣北有博陽故城王氏曰應在山東濟南府濟水北 膠東王

田市都卽墨今山東萊州府膠州卽墨縣

燕分爲二 燕王臧荼都薊故燕都 遼東王韓廣都無

終今順天府薊州王田縣



魏分爲二 西魏王魏豹都平陽今平陽府 殷王司馬卬

都朝歌今大名府濬縣西廢衛縣是

韓分爲二 韓王韓成都陽翟故韓都 河南王申陽都

洛陽今河南府城東洛水北是

秦分爲三 雍王章都廢丘即犬丘見前周懿王 塞王司馬

欣都櫟陽見前漢都

翟王董翳都高奴今延安府鄜州東高奴城是

漢末羣雄分據攷

赤眉據長安故漢都 王郎據邯鄲故趙都 彭寵據漁陽

隗囂據天水今陝西鞏昌府

盧芳據安定今陝西平涼府

鎮原今甘肅 竇融據河西今甘肅 秦豐據黎丘今襄陽府宜城縣東

有黎今歸德府治 劉永據睢陽今歸德府治 張步據臨淄都劇今青

州府壽光縣今充州府 董憲據東海今充州府 李憲據廬

江州今廬州府 公孫述據成都今成都府

十六國分據攷

漢劉淵據離石今山西汾州 徙蒲子今平陽府隰州 又徙平陽

劉曜據長安改號趙

成李特據廣漢今四川潼川州鹽亭縣東廢縣是 李雄據成都至李壽

改號漢

後趙石勒據襄國今順德府徙都鄴見前曹魏都冉閔改號魏

燕慕容廆世居遼東徙徒河之青山在廢大寧衛東廢徒河縣又徙

棘城在大寧之東南甄徙龍城大寧東廢柳城是儁徙薊故燕都又遷

鄴

秦苻健據長安

後燕慕容垂都中山今真定府定州

南燕慕容德據滑臺今大名府滑縣徙廣固在青州府城西四里

北燕馮跋據和龍即燕之龍城

附 西燕慕容永據長子今潞安府屬縣燕不在十六國之數

後秦姚萇據長安

西秦乞伏國仁據枹罕今臨洮府河州徙苑川在臨洮府西境乾歸徙

金城即蘭州熾磐徙枹罕暮末保南安今鞏昌府東南廢源道縣

夏赫連勃勃據統萬今榆林衛廢夏州是

涼張軌據姑臧今涼州衛是重華徙燉煌今肅州廢沙州是

後涼呂光據姑臧

南涼秃髮烏孤據廉川在秦州廢上邽縣西南遷樂都

在今西寧衛城西 晉西平郡治也 利鹿孤徙西平儔檀徙姑臧後還

樂都



北凉段業據張掖今甘州山丹衛沮渠蒙遜徙姑臧

西凉李暠據燉煌遷都酒泉今肅州衛

附 翟遼據黎陽今大名府濬縣 楊茂搜據仇池今鞏昌府成縣

隋末羣雄分據攷

魏公李密據鞏今河南府屬縣 夏王竇建德據樂壽今河間府獻縣

遷洛今廣平府 楚帝朱粲據南陽今湖北府 操師乞據豫章

今江西 南昌府 楚帝林士弘退保餘干今江西饒州府屬縣 又遷虔

州今江西贛州府 定楊可汗劉武周據馬邑今大同府朔州 永

樂王郭子和據榆林今陝西榆林衛 梁帝梁師都據朔方

今榆林衛西 廢夏州是 梁帝蕭銑起兵巴陵今湖廣岳州府 據江陵

今荆 州府 梁王沈法興據毘陵今常州府 吳帝李子通據

江都今揚州府 吳杜伏威據歷陽今江南和州 秦帝薛舉

據金城今臨洮府蘭州 仁杲居圻墟城今平涼府涇州東有薛舉城

凉帝李軌據武威今涼州永昌等衛 許帝宇文化及據魏

縣今大名府屬縣 鄭帝王世克據隋東都今河南府城是 漢東

王劉黑闥起漳南今山東東昌府高唐州恩縣西廢東陽縣是 據洛州見

魯王徐圓朗據衮州今府 燕王高開道據漁陽今順天府

大興 宋輔公祐據丹陽今江寧府治

謙牧堂

五代十國分據攷

吳楊氏居揚州府今

吳越錢氏居錢塘今杭州府附郭縣

荆

南高氏居江陵今荆州府附郭縣

楚馬氏居潭州今長沙府

南漢劉氏

閩王氏居福州府今

延政居建州今建寧府

南唐李氏居金陵

居廣州府今

蜀王氏居成都府今

北漢

今江寧府

景徙洪州今南昌府

後蜀孟氏居成都

劉氏居晉陽今太原原縣

宋西夏所都

趙元昊都興慶府今寧夏衛城

元末羣雄分據攷

天完徐壽輝起蘄水今黃州府屬縣

陳友諒改稱漢居江州今九江

江府

宋韓林兒起潁州今鳳陽府屬

都汴

周張士誠起

泰州今揚州府屬

居吳今吳縣

改稱吳

夏明王珍居重慶

府今

漢書景帝時諸王來朝有詔更前稱壽歌舞長沙王發

但張袖小舉手左右笑其拙上怪問之曰臣國小地

狹不足回旋帝乃以武陵零陵桂陽益焉元遺山詩

回旋我亦笑長沙



膠城嚴行明末好古士也著資治通鑑補四百餘卷自言積三十年苦心冬夏不暫輟余謂司馬公本止二百四十九卷此補無乃太多乎

釋氏感通錄云梁武帝遣郝騫等往天竺迎旃檀像其王摹刻一像付騫天監十年至建康帝迎奉太極殿今弘仁寺所供未知卽是此像歟抑果優填王所刻

歟

楚三戶昭屈景也三游游俠游說游行也三端文士筆勇士鋒辯士舌也

良造王良造父也 夔襄后夔師襄也或夔曠師曠也

由夷許由伯夷也 胥原子胥屈原也 彭胥彭

咸子胥也 和鵲醫和扁鵲也 京管京房管輅也

梓竈梓慎裨竈也 周柳周美成柳永也 辛蘇

稼軒東坡也 陰何陰鏗何遜也 袁灌袁盎灌夫

也 蕭朱蕭育朱博也 王貢王吉貢禹也 曹劉

曹植劉楨也 羊何羊璿之何長瑜也 並謝靈運友 顛

天太顛閔天也 東馬方朔相如也 研桑計然弘

羊也 管蕭管仲蕭何也 孫許孫綽許詢也 顏



謝延之靈運也 沈宋佺期之間也 張王張籍王

建也 錢郎錢起郎士元也 何劉何遜劉孝綽也

沈謝沈約謝朓也 溫邢子昇邢邵也 邢魏邢

邵魏收也 沈范沈約范雲也

脫畧輕易也 跌宕放逸也 游揚卽揄揚也 介紹

傳命之使也 瞠眙驚怪直視也 盧胡嗝噓哈臺

軒渠噴飯闕堂撫掌解頤皆笑也 角睩眼角斜視

也 咫聞近聞也 夫君卽君家也 弭節按節徐

步也 擊汰汰水波言舉大權以擊水波也 據梧

以梧爲几而據之也 杖拏拏船篙也 短兵刀劍

也 櫺具古長劍首狀也 曠弩引滿曰曠 負蘭

蘭盛努矢者 揚榷猶言發揮 試兒今之試週也

玉卮無當當底也 偏提卽注子一云酒斝 唐

肆今過路亭無壁者 爰書爰換也謂以文書換口

辭也 雋永雋肥肉也 弁髦男子始冠則用之既

冠則棄之也 神漢謂山澤氣相蒸興雲而爲雨也

保介農官之副也 封靡封殖侈汰也 宥密宏

深靜謐也 藝極藝準也極中也謂貢賦多少之則



殿屎呻吟也 回適邪僻也 旬宣徧布也 沆

瀼北方夜半氣也 朏月出也 旁死魄初二日

哉生明初三日 哉生魄十六日也 鬱儀奔日之

仙羲和也 結璘奔月之仙嫦娥也 飛廉風師也

屏翳雨師也 豐隆雲師一云雷師 青女主霜

雪神也 戢音音擬又音逆又音集盛也多也

聶與牒同音輟薄切肉也 怨鳥即謝豹子規也

沛艾馬行貌 渴筆謂枯無墨也 厮養厮析薪者

養炊烹者 窮袴前後有襠不得交通也 大小垂

手舞也 盪屋水曲曰盪山曲曰屋 欵段欵遲也

段形也言形段遲緩 泙忍垢濁也 堠封土為臺

以記里也 香壁墨也 臺笠臺夫須也謂莎草言

以夫須為笠以禦暑雨也 上除上巳也 齊牢牢

俎也謂共牢而食 耳衣暖耳也 鴟夷韋囊也以

盛酒 黃公鸚也 蒯緹蒯茅類可為繩緹謂把劍

處 仁祠佛寺也 湖目蓮子也 青衿青領也學

子之服 刀圭十分方寸七之一堆如梧桐子大

麟趾裹蹄黃金也 打盹躁進士不捷而飲也 剖

劓剖曲刀劓曲鑿也 侔莫猶云努力 甌脫作土

室候望處也 蹶張足踏弩也 迷迭都梁婆律皆

香也 渠答鐵蒺藜也 陽邁金之精者也 臨衝

戰車也 素封富人也 一牛鳴地五里也 吠蛤

蛙也 黃帽榜人長年三老皆舟子也 青奴竹夫

人也 南宮禮部也 酪奴茗也 玉蟲燈花也

不律筆也 凍梨老也 探支預借也 寒具餽子

也 隳括隳柔曲者括正方者 骯髒亢直也 陸

離參差也 端公御史也 突梯委曲順俗也 戍

削言衣美也 裋褐裋童稚所著褐毛布衣也 輪

奐輪高大奐衆也 熹微日初出也 蘭錡頓甲兵

架也 磬折腰曲如磬之折也 恢台恢大也台與

胎同言夏氣大而育物也 磬控磬騁也謂使之曲

折如磬控止也 郭郎傀儡也 伊優曲媚也 蕭

辰秋日也 闡茸不肖也 襜褕笠子也又不曉事

人也 斥候斥度候望也 明府唐人呼縣令也贊

府丞也少府尉也亦曰贊公少公 惇史記其惇厚

之德也 鼓篋謂始入學擊鼓警衆乃發篋以出書



籍也 函丈函猶容也講習相對容丈足以指畫也

負劍辟咄詔之者負謂置之於背劍謂挾之於旁

口旁曰呬辟呬詔之謂傾頭與語也 夷猶自得也

輪困屈曲盤戾貌 堪輿者堪天道輿地道也

徽纏徽三股索纏二股索也 水叟婦翁也 支婆

庶母也 盤渦三峽中水波圓折者名曰盤盤音漩

醞藉如醞有味及有薦藉也 受釐受禧也 慮

囚卽錄囚也 椎埋椎殺人而埋之也 鞞疥鞞圻

裂疥寒創也 肺附如肺附肝也 睚眦睚舉眼眦

目匡也 黎祁豆腐也 奏厠奏向也 綦極也齊

人語 黃散黃門侍郎散騎常侍也 睥睨不正視

也 媒蘖媒酒教也蘖麩也齊人名麩餅曰媒 籍

甚狼籍甚盛也 按堵按次第堵墻壁不動也 鈎

距鈎致其情距閉之不能去也 城旦春旦起行治

城春 鬼薪取薪給宗廟也 白粲擇米使白也

酎金醇釀爲酎八月嘗酎以薦祖廟諸侯出助祭金

三重也 棄繻繻帛邊關出入烈繻頭以爲合符也

陸沉無水而沉也 僑人寄寓者也 繾綣反覆

不離也牢固相著之意 搯擊擊古腕字 尺籍伍符者伍符五五相保之符也 網紀謂參佐操一府之綱紀者 蒼頭廬兒皆官府給役者 三農山澤平地也 卒更者正卒役一月一更踐更者出錢顧貧者役月二千曰踐更過更者例人各三日戍邊出錢三百入官官為給戍是為過更 姿首姿謂有色首謂鬢髮也 白望虛名也 蘧蔭今之蘆蔭也 暴室掖庭之室取曝曬衣也薄室同 汙萊汙停水萊草穢也 頭會箕歛從人頭數出穀以箕歛之

婆娑肢體緩縱不收貌 同產子養昆弟之子以為子者 流蘇盤線繪繡之毬五彩錯為之同心而下垂者蘇猶鬚也又散貌 豐駕猶覆駕 緩頰徐言也 杼柚織具也柚亦作軸 期門人主微行與期於門下也 噂喒聚語也 堂皇堂無四壁者 左右甄甄音堅左右翼也 左右孟田獵陳名 職競職主也競力也專力為此也 泮宮先生教授也 儀馬廟中木馬也 蜜脾釀蜜如脾也 執金吾金吾鳥名主辟不祥 戊巳校尉諸干皆有正位惟戊



已寄住言其於西域無定居也 舳艫舳船尾持柁處 艦船頭刺棹處也 闕人精氣奄閉也 周陸遮

禽獸圍陣也 承塵以承塵土也 望郎吏部郎也

粉署諸曹郎署也 艾帳雉翳也 袞然進也又

盛服貌 泐解散也 啟服馬名也 犄角犄牽其

足角執其角也 參商參昏見商晝見二星晝夜不

相見也 綿蕞立竹及茅索管之以習禮也 風琴

簷馬也 感槩感而立節槩也 橐籥橐衣囊籥糜

也 曹悶也 泊肉汁也 拾瀋猶云覆水難收

門牡所以下閉者以鐵爲之 班荆布荆坐地也

班馬班別也 鬱攸火氣也 潘沐潘米汁以沐頭

也 迹人迹禽獸者 臭味同類也 躑是也 首

鼠兩端鼠首一前一却也 涓人涓潔也爲人主潔

除之人 束薪言急之甚物濕則易束也 乾沒豫

居物以待之得利爲乾失利爲沒 琅璫長鎖也

尉薦安尉而薦達之也 甌窰高亢狹小之田汙邪

下濕尖角之田 販指販牛羊也 轉圜言易也

括囊括結也言自閉慎也 金鹽五加皮也 上游



上流也 棘矜棘與戟同矜戟之把也 黃琉璃簞

也 子午道謂南北道也 鈛簞鈛如瓶簞即竹簞

投書可入而不可出也 彤刑去頰旁毛也 葭莩

之親蘆簞中白皮至薄者也 令甲謂首篇也 陵

夷言如丘陵下平也 譙樓又為巢樓俱言其高也

公除以天下為公而除服也 屬籍宗屬之籍今

之玉牒也 黃襪乳母服也 盱衡眉上曰衡謂舉

揚目也 清狂不狂似狂也 窮髮無毛之地毛草

也山川以草木為髮 屬疾託疾也 樵蘇樵取薪

蘇取草也 請室請罪之室也 就壻贅壻也 偏

戰各居一面約日定地鳴鼓而戰也詐戰不約日而

戰也 菊婢金鳳花也 齧膝良馬名低頭口至膝

也 牛衣編麻為之 文無害害勝也無能傷害之

也 胥靡胥相也靡隨也聯綴之使服役也 禡祝

禡求子之神也 少府天子藏錢之所也 不得要

領衣要及領也凡持衣者先執之 狎至相因而至

也 侵牟言如牟賊之食苗也 紫泥天子六璽皆

以武當紫泥封之 鹿車車窄小載容一鹿也 姑



息姑且也息安也 稽故謂稽留以事故 烽燧燧  
 煙也夜望烽晝望燧 敗北北方幽隱之地故軍敗  
 者曰北 牢盆牢價值盆鬻鹽盆也 伏臘秦德公  
 始為伏祠伏者金氣伏藏之日也冬至後視百神曰  
 臘 氍毹毛席也 觚稜殿堂最高處又八觚有稜  
 者也 抗衡者衡車上橫木言相對不相下也 淮  
 南大小山如大雅小雅也 采摠謂連闕曲閣也以  
 覆重刻垣墉之處又闕之屏也 振子逐疫之人也  
 搜牢謂牢固藏貨者皆搜取之 叟兵蜀兵也

意錢卽攤錢 玉燭四氣和也 焚巫尪謂瘡巫禱  
 雨鼻孔向上天哀之故下雨 營蕭脂及香草也  
 糗糒環餅也 餽餽餽也 餽餹起餅也發酵使麵  
 輕高浮起而炊之餽哀去聲媮媮上聲 管井無水  
 井也 弇中狹路之中也 要害於我為要於敵為  
 害也 塗林丹若金櫻若榴皆石榴也其甜者曰天  
 漿 督亢膏腴也 莊馗大道也 髦毼蠻夷毛罽  
 也 綸幣布之精者也幣與貫通 瀉鹵鹽地 潢  
 洿停水也 委禽奠鴈也 無焦類無子遺也 耳

孫玄孫之孫但耳聞也 尊章舅姑也 乘龍得佳

壻也 子卿大夫之嫡子也 踞轉轉衣裝也 窈

榘窈纖細不滿榘宏大不入也 離局遠部曲也

大黃肩弩也 剛挂射雉弩矢也 弣弓中央把

輶輶匈奴車 狙擊密伺擊人也 雕胡菰米也

肅霜良馬也 燧象即火牛法 捫馬取馬乳捫治

之可食也 設嘔吐也 活東鼓師並蝦蟇也 豸

解也直是反 旁午一從一橫也 塊然如土塊也

適古悠字笑貌 長物賸物也 碁閒毒亂也

么膺微細也 選奕却不前也 離疏釋躡去蔬食

釋繩屨也 交關交通也 拓落不偶也落魄同亦

曰落薄 窀穸窀言原窀言夜也猶言長夜謂葬也

桴柎棺中靈牀也 癡癡音縱記小兒病也 甌

噓鼻塞也 麇至羣至也 較轆蹂踐之也 詆謔

毀醜也 居閒居中間為道地也 內謁主通名者

又曰典謁 蛾伏蛾與蟻同 齧齧側齒為齧咬為

齧 盤互盤結交互也 方洋常洋皆徜徉也 骹

骹屈曲也骹古委字 搏膺椎胸也 噢咻痛念聲



壯髮當額前髮侵下而生也 清盧盧目瞳子也

面之不正視也 魑結堆髻也 跋盭盭與戾同

足蹠戾不可行也 上僂肩偃也 甚口有口辯也

甕無過言也 關說因之而納說如有所關也

風指以指風之也 龐服雜色服也 袒服婦人內

衣也 跗注戎服若袴而屬於跗與袴連 衣製雨

衣也 弋綈黑繒也 諸于大掖衣也 側注冠側

立而下注也 厠踰近身小衫也 屣屣草履也

履綦履下飾也 酺聚飲食也 腊毒食久而毒也

攻苦食啖啖作淡 舉白白見驗乾也 翠鵝鳧

尾肉胖鳥脅側肉與鴛脾肱也 醜鼈竅也 大白大

爵也罰用之 歡伯酒也 酒吏酒糾也 酌卽酗

也 辜推占市易也 方罫碁局間目也 筍業簾

傍直立木曰筍橫木曰業 都盧合浦南國名其人

善緣木 獬狁猿類而白腰以前黑 罽麗音獨鹿

小網 左纛以旄牛尾置駢馬頭上以亂馬目不令

相見也 斑駁車闌間皮筐以安駮者 桎梏行馬

也 巨黍古良弓也 齟齬不合也 咀嚅鉏鋸並同

祖道祭黃帝子纍祖也 駘蕩宮名言春時景物

滿也駘娑亦宮名馬行迅疾貌言宮之深大迅行乃

徧也杵詣亦宮名言美木盛也 筵筭筵小破竹也

折草卜筮 靈氛善卜人巫咸古神巫也 盛鬻盛

鬻也 黼黻嬈也奴了反 突與東南隅為突西南

隅為輿 泝泝洸漂絮也 孟浪不精要也 龍豸

豸尾也日月會於尾謂十月也 介剛一足也 鼓

筴播精鼓籛也筴小箕精簡米也 兀者亦剛足人

白莢藕也 烏裊柿也 鹵莽耕不善滅裂芸不

善也 臯比虎皮也 兩樹交陰曰樾 穴中曰窠

樹上曰巢 苓通苓猪矢通馬矢也 蕊榜以天榜

在蕊珠宮也 白打宮中鬪戲也 噤齟忍口怒齒

也 筧以竹通水也 揜捋衣也 擗然勁忿貌

紕繆舛戾也 綷繅衣聲也 縮胸不任事貌 屈

強不服貌 自詭詭責也自以為憂責也 移病移

書稱病也 闕闕明其等曰闕積其功曰闕 義甲

義爪甲也 治奉道家淨室也 親串串狎也 擗

標拊心也 原廟再作廟也 下走僕役也 答課



果之似李者

離支卽荔支

羈糜羈馬絡頭糜牛

韜也

三尺法謂以三尺簡書法律也

進賭債也

蹇修古良媒也

卷白波言快飲而盡也

大宅

面也

誦諉以言相屬也

食閩方言云勸也亦謂

之慙慙

三翼船名也

九言濫觴於洞酌彼行潦挹彼注茲或曰始自高貴鄉

公後人亦少有爲之者元釋明本中峰梅花詩昨夜

西風吹折中林梢渡口小船滾入沙灘坳野樹古梅

獨卧寒屋角疎影橫斜暗上書牕敲半枯半活幾個

擲蓓蕾欲開未開數點含香苞縱使畫工竒妙也縮

手我愛清香故把新詩嘲楊升庵云玄冬小春十月

微陽回綠萼梅蕊早傍南枝開折贈未寄陸凱嶺頭

去相思忽到盧仝窗下來歌殘水調珠沉明月浦舞

破山香碎王凌風臺錯恨高樓三弄叫雲笛無奈二

十四番花信催盧贊元酴醾花云天將花王國艷殿

春色酴醾洗妝素額相追陪絕勝濃英綴枝不韻李

堪友橫斜照水攬先梅瑤池董雙成浴香肌露竹林

嵇叔夜醉玉山頽風流何事不入錦囊句清和天氣

直挽青陽回釋不你道人廬山云一上一上上到匡  
廬山眼觀四海身在五雲間芳草連天齊遮鸚鵡綠  
落花滿地亂點鷓鴣斑洗鉢池邊浪生龍戲躍講經  
臺畔風嘯虎生寒此處百丈紅塵飛不到清風明月  
讓與道人間

酒不到劉伶墳上土長吉八言也男兒生不成名身已  
老少陵九言也黃帝置鼎於荆山煉丹砂丹砂成騎  
龍飛上太清家太白十言也中山故人應有招我歸  
來篇東坡十一言也

脯資餼牽脯乾肉也資糧食也餼腥肉也牽生牲也

鞵鞞鞞在馬背曰鞵在胸曰鞞在腹曰鞞在後曰

鞞 贈賻祿含去聲車馬曰賻貨財曰賻衣服曰祿珠

玉曰含 螟螣蝨賊螟食心螣食葉蝨食根賊食節

追蠡趙希鵠云追琢也今畫家滴粉令凸起謂之追粉

蠡剝蝕也言禹之鐘欵文追起處剝蝕也趙岐註非

雕造九經起於周廣順顯德之間孟蜀廣政間亦有刊

本其字畫皆工書者爲之故端嚴有法卷末必載書  
者官銜姓名此其所以不庸俗而可傳達也今固已



不可得見即兩宋所刊亦不易得而春秋三傳刻於皇祐中者洪容齋尚譏其殊不逮前則南渡而後更可知矣然此時得紹興刊本幾種亦當什襲珍重也歲月有雌雄見虞喜安天論大抵以十干為歲陽故曰雄十二支為歲陰故曰雌但以畢為月雄觜為月雌則不可曉雷有雌雄見師曠占霹靂者為雄旱氣也不大霹靂者為雌水氣也郎顛傳引易雌雄秘歷又有孝經雌雄圖今其書皆不可見又箭有雌雄見遼史車駕遠歸閣門使持雄箭勘箭官持雌箭比較相

合而後入宮謂之勘箭內箭為雄外箭為雌

三字年號

始建國 王莽

中大通 並梁武帝

四字年號

建武中元 漢光武帝 太平真君 元魏太武帝

天册萬歲 萬歲通天 萬歲登封 並武后

太平興國 宋太宗 大中祥符 宋真宗

建中靖國 宋徽宗

延嗣寧國 天祐垂聖 福聖承道 並夏主趙諒祚

天安禮定 夏主秉常

天儀治平 天祐民安 並夏主乾順

六字年號

天授禮法延祚 夏王趙元昊

天賜禮盛國慶 夏主秉常

貞明承智大同 南詔

年號相同

建始 漢成帝 建和 漢桓帝 南涼秃髮利鹿孤

元光 漢武帝 元和 漢章帝 元康 漢宣帝 晉惠帝

元嘉 漢桓帝 元熙 漢劉淵 太元 吳主孫權 晉孝武帝

天璽 吳主皓 天統 齊後主緯 天保 北齊主洋 後梁主蕭巋

天祐 唐昭宗 天福 後晉高祖 天德 閩王延政 金主亮

天會 北漢主劉承 天禧 宋真宗 天慶 遼主耶律延禧 夏主純佑

黃龍 漢宣帝 永元 漢和帝 永光 漢元帝 宋廢主子業

永初 漢安帝 永建 漢順帝 永嘉 漢冲帝 晉懷帝

永熙 晉惠帝 永昌 晉元帝 永泰 齊明帝 唐代宗

青龍 魏主叡 延康 漢獻帝 延熙 漢後主 後趙石弘

延興 魏孝文帝 光天 蜀王建 紹興 宋高宗 西遼主夷列



咸寧 晉武帝 後涼呂纂  
咸康 晉成帝 蜀王衍  
泰始 晉武帝 宋明帝

麟嘉 漢劉聰 後涼呂光  
大同 梁武帝 遼太宗  
大德 西夏主乾順 元成宗

大寶 梁簡文帝 南漢劉鋹  
皇建 北齊孝昭帝 夏西主安全  
武成 周明帝 蜀王建

乾亨 南漢劉龔 遼策宗  
乾德 蜀王衍 宋太祖  
乾祐 後漢高祖 西夏主仁孝

乾道 西夏主秉常 宋孝宗  
保大 南唐李景 遼主延禧  
開運 晉出帝 西夏主元昊

至德 陳後主 唐肅宗  
至元 元世祖 元順帝  
正德 西夏主乾順 明武宗

貞觀 唐太宗 西夏主乾順  
貞元 唐德宗 金主亮  
天順 元泰定帝子阿速吉 明英宗

大慶 西夏主元昊 西夏主仁孝  
按本朝而同號者惟唐之上元西夏之大慶元之至元耳 上元見下三同內

年號三同

元興 漢和帝 吳孫皓 晉明帝 趙石虎

天興 元魏道武帝 定揚劉武周 漢桓帝 涼張祚

五鳳 漢宣帝 吳孫亮 漢安帝 晉惠帝

永隆 梁梁師都 唐高宗 後趙石祗 漢劉聰

更始 漢劉玄 西燕慕容冲 魏主芳 北燕高雲

大定 後梁蕭譽 周靜帝 廣運 後梁蕭琮 北漢劉繼克

太安 晉惠帝 秦苻丕 永平 漢明帝 元魏宣武帝

上元 唐高宗 唐肅宗 南詔異牟尋

年號四同

建平 漢哀帝 後趙石勒 漢章帝 成李特

大安 後涼呂光 遼道宗 永康 漢桓帝 晉惠帝

建武 漢光武帝 晉元帝 永安 吳主孫休 北涼沮渠蒙遜

永樂 涼張重華 五代張遇賢 天啟 魏元法僧 梁蕭莊

年號五同

建元 漢武帝 秦苻堅 漢劉聰 齊高平 晉康帝

建興 漢後主 吳主亮 後燕慕容垂 成李雄

太初 漢武帝 南涼秃髮烏孤 宋元凶劼 西秦乞伏乾歸

太和 魏主獻 晉帝奕 後趙石勒 元魏孝文帝 漢李勢

太平 吳主亮 楚林士弘 北燕馮跋 梁敬帝

永和 漢順帝 北涼沮渠牧犍 晉穆帝 閩王鱗 後秦姚泓

永興 漢桓帝 秦苻堅 晉惠帝 元魏明元帝 魏冉閔

改元最多者

漢武帝十一 唐高宗十四 武后十六

隙光亭雜識卷四終



--	--	--	--	--	--	--	--	--	--	--	--	--	--	--	--	--	--	--	--



